



O LE SULU SAMOA



O LE NUSIPEPA FAA-LE-LOTU
NA FAAVAEINA I LE T. A. 1839

EKALESIA FAAPOTOPOTOGA KERISIANO SAMOA



“ O lenei, ia outou o atu e fai nu'u uma lava ma so'o...”

O Iesu lava le Savali o le Filemu mo tagata uma.



SULU O SETEMA 2006



FAASINO MATAUPU

1. FAATOMUAGA	2
2. LAUGA	2-4
3. TALA FAAAUAU	4-10
4. FAASILASILAGA	10-14
- Polokalame o Mafutaga a Autalavou Ekalesia Aoao	
- Faaulufalega Malumalu EFKS Fairfield Niusaelese Ausetalia	
5. TALAO E MALILIU	14-15
6. ATA	16
-Maa Faamanatu Ioane Viliamu i Sapapalii	

FAATOMUAGA

“O lenei, ia outou o atu e fai nuu uma lava ma soo”.

E toe faatalofa atu le avefeau a la tatou Ekalesia i le suafa paia o lo tatou Alii Faola, le Keriso Soifua, o le Ao o le Ekalesia, i lenei foi masina taua o le tausaga.

E tusa ai ma faatatauga a le Ekalesia, ua atoa nei ia Setema le 176 tausaga talu ona taunuu mai le Tala Lelei i laufanua o si o tatou atunuu o Samoa. O le viiga lea o le Atua e le faaititia mai lea tausaga i lea tausaga o lo tatou ola faa-Kerisiano.

Ia saga faamanuia tele mai lo tatou Alii e ala i le galuega faa-Misionare faapea le galuega talai a la tatou Ekalesia ae tainane o Fata Faitaulaga e fia o le talitonuga Faa-Kerisiano, i Samoa ma le lalolagi aoao. Tau ina ia manuia lava faitauga o lenei foi masina.

Faafetai,

Faatonu Sulu.

* * * * *

LAUGA

Tusi Faitau: *Feagaiga Tuai: Kenese 13:1-18*
Feagaiga Fou: Ioane 16:1-15

Matua: *Ioane 16:7 “Ae peitai a’u, o le upu moni lava ou te fai atu ai ia te outou, e aoga ia te outou pe a a’u alu ese, aua afai ou te le alu ese, e le maliu mai le fesoasoani ia te outou, ae afai ou te alu, ou te auina mai o ia ia te outou.”*

Manatu Autu: **“E foia e le Mana o le Agaga Paia o tatou faafitauli uma.”**

Soo se faafitauli, tuga pe laititi, lapo’ape pae’e, matuiā pe feololo foi, atoa foi ma mea e tutupu i totonu o aiga, o misa ma feeseeseaiga. E matua moomia ai lava se tamā poo se matai e loloto lana tofa ma tuutumamao lana faautautaga. E matua manaomia se taitai faatuatua i le Atua ma faalagolago i le mana o le Agaga Paia e fai ma tali o faafitauli uma.

Le mana o le Agaga Paia e mafai ona mafolafola mea ua manuminumi, ina ia maua le nofo lelei ma le fealofani. O le faia o faaiuga tonu i soo se faafitauli e tupu mai, o le finagalo lea o le Atua e manuia ai tofiga uma ua valaauina ai. E ui lava o le natura o le tagata o le agasala, e fetaii pea lava ma faafitauli eseese o le olaga. E ui lava foi ina taumafai e fofo, peitai, e mautinoa lava e tupu tele pea ia faafitauli, pe afai e misa ma le mana o le Atua, e ala ilona Agaga Paia.

O le toe foi ae o Aperamo ma lona au aiga, faatasi ma Lota le atalii o lona uso, atoa ai ma le anoanoai o lona tamaoaiga na maua mai i Aikupito. Lea ua latou agai atu i Peteli o le faasinomaga lea a le Atua mo ia. O lea ua toe taitaina Aperamo e le Atua sei ia taunuu i le mea ua ia finagalo iai mo ia. Lea ua ia faatuina ai le fata faitaulaga ma ua valaau ai i le suafa o le Atua soifua. Sa matua tamaoaiga Aperamo i manu e tele, o auro ma ario e tele.

E le gata ia te ia, ao Lota le atalii o lona uso, sa ia te ia o povi ma mamoe e tele ua tau le ofi le laueleele sa latou nonofo ai, e le na o i latou, ao tagata o sã Kananã ma sã Perisē. Ai o le mafuaaga lea o le femisaai o a laua leoleo mamoe ma povi ona ua le lava le vao e fafaga ai manu.

E ui lava o se faafitauli lea ia Aperamo, peitai sa ia faia se faaiuga tonu ona o le moni o lona faatuatua ma lona ola talitonu i le mana o le Atua. E lei manao Aperamo e alia'e mai ni feeseeseaiga i lo la va ma Lota poo a la auuana. O le ala lea o lona tuuina atu o le avanoa ia Lota e filifili muamua ai i se fanua e fia nofo ai. O se faaiuga na faia ma le potu ma le faatuatua i le Atua, ina ia maua ai lo la nofo fealofani.

Sa filifili Lota i fanua laugatasi uma aua o vaega lafulemu ia o le laueleele e faasusuina e le vaiatafale o le Ioritana. E pei o foliga o faatoaga a le Alii e faasusuina e le Eufirate, Pisona ma Kaiona. Ua pei foi o laueleele ma laufanua o Aikupito. Na oo lava foi le manao o Lota i Soara e iai Sotoma ma Komoro. O aai na faaumatia e le Alii, se manu e oti ai, pe ana leai aao laveai o le Atua na laveaina o ia ma ona afafine.

Faauta i le amiotonu o le faaiuga na faia e Aperamo, ua fetalai mai le Atua ia te ia ina ua la tetea ese ma Lota. Ua fetalai mai "Ou te foaiina atu ia te oe ma lau fanau ma fanau a lau fanau o lenei laueleele uma. Sei e vaavaai ma iloa atu i le mea ete iai, i le itu i matu ma le itu i toga, o sasae ma sisifo, aua o le laueleele uma ua e vaai atu nei iai, ou te foaina atu mo oe ma lau fanau e faavavau. O lau fanau foi e pei o fetu o le lagi e pei foi o le efuefu o le laueleele e le mafai e se tasi ona faitaulia lona toatele. Ua lagona e Aperamo lona fiafia aua ua saoloto lona loto ma lona mafaufau. Ua faapea foi ona faamalositia lona agaga faatuatua i le Alii lona Atua.

O le mavaega a Iesu ma ona soo sa matua faamalositia ai ma faamafanafana ai le au soo i le faigata ma le

mamafa tu o le galuega o le a latou feagai. O tiga ma faafitauli e tele o le a latou feagai i le lalolagi. Ua aaoaina i latou ma saunia i latou uma, ia tuuina atu atoatoa o latou ola mo le galuega talai, ma ia maua le alofa faamaoni i le Alii o Iesu Keriso faapea le tasi i le tasi, e pei ona alofa o Iesu ia te i latou ma soo se tagata. O le luitau a le Alii i ona soo ia tumau i le onosai ma le alofa, aua o faailoga na o le moni o le faatuatua ia Iesu Keriso.

O le a inosia ma tulia outou i fafo e tagata mai sunako ona o le inoino i le Tala Lelei. O le a lamatia foi o outou ola, o le a fia fasioti foi tagata ia te outou ona o la outou talaiga. Aua latou te le iloa le alofa o le Atua le Tama ma Iesu Keriso lona alo atoa ma le mana o lona Agaga Paia. Le Agaga Paia poo le fesoasoani lea e foaiina e Iesu Keriso pe afai e taunuu o ia i lona mamalu silisili. Le Agaga Paia n ate aumaia le potu ma le tamaoiga o mea lelei e tele. Le mana o le Agaga Paia e mafai ona fai ai e le au soo o mea uma. E tutuli i temoni, e faamalolo i e mama'i, e faatutu i e pipili ma faapupula i e tauaso ma mai eseese uma.

O le faamatalaina e Ioane o le galuega a le Agaga Paia, o le faailoga lava lea o le aumaia atoatoa e le Atua o lona mana ma lona malosia e galulue faatasi ai ma le au soo. O le faailoga o le iai o le Agaga Paia e faailoa mai ai agasala a le lalolagi. E faailoa mai ai le amiotonu a le Atua. E faailoa mai ai foi le faamasinoga a le Atua i le lalolagi.

Le Ekalesia e, poo ua e talitonu eai le mana o le Agaga Paia? Afai e leai lau tali, o lona uiga o lona e te ola pea i se olaga saisaitia i le agasala. A ia e manatua foi e leai se agasala e lilo e le faaaliga. Aua o lea ua galue le Agaga Paia i o tatou loto. Poo ua e talitonu ea i le Amiotonu a le Atua? Afai e leai lava lau tali, o lona uiga o oe le isi tagata fai faaiuga sese. Ia e manatua le faaiuga na faia e Aperamo, lea na faamanuia ai le Atua ia te ia ma ana fanau.

O le faaiuga amiotonu a Iesu lea ua e ola ai ma o'u maua ai le ola e faavavau. Ua fia ni tagata ua pologa talu le sesē o ni faaiuga o ni faamasinoga ua e faia? Afai e faalagolago a tatou faaiuga i le mana o le Agaga Paia e le taumateina le manuia o mea uma tatou te faia, ae afai tatou te faalagolago i lo tatou iloa ma lo tatou atamai ona ua leva ona tatou galulue, ona le manuia lea. Afai tatou te faalagolago tasi i le mana o le Agaga Paia, ona ave lea o i tatou ma mea faigaluega e galue ai le Agaga Paia o le Atua.

Ioe le Ekalesia e, o le galuega a le Agaga Paia e faamalosi ma faalototeleina ona tagata galulue. Na te faaali le upu moni ma taitaiina i tatou i le ala moni i le ola faavavau.

Talitonu ma tutumau i le faatuatua i le Atua ona auina ifo lea e ia le mana o lona Agaga Paia e fesoasoani ma faamanuia ia te oe le Ekalesia.

Soifua ona o le suafa o Iesu,
Amene.

Saunia: **Lamese Faafili (F.S.)
Togo, Saleimoa.**

@ @ @ @ @ @

O Tala Faaauau mai:

Feau Faalilolilo a Da Vinci: (The Da Vinci Code):

OPUS DEI:

O se tasi o manatu ogaoga o le tusi a Dan Brown, ua ia faapea ai, ona o le taumafai o le Ekalesia Kerisiano e nana ma faamutaina faamaumauga o le talafaasolopito moni e uiga i le itu tagata o Iesu ma lona gafa ia Maria le Makatala, na amataina ai se sosaiete faapitoa e fai mo latou tiute le su'eina ma faatamaiaina o faamaumauga uma e ono faamaonia ai lea tulaga. O le igoa o lenei sosaiete o le *OPUS DEI* – ma o loo faia pea lenei galuega e oo mai i le aso nei.

O le manatu o Dan Brown o le Opus Dei

- E i lalo o le vaavaaiga a le Pope ma le Vatikana
- Sa tofia e puipei talitonuga o le faatuatuga faa-Katoliko mai le faaseseina e nisi

- E fesootai ma le Inquisition & Dominican Order [Black Friars] lea sa faatuina i le 15 – 17 seneturi e faasalaina tagata e tete e talitonuga o le lotu
- E Faamamafa e lea sosaiete le faaogaina o auala e faatigaina ai le tino pe a agasala (corporal mortification)
- E Taumafai e tape le tala moni ia Iesu poo le Ipu Paia/Holy Grail
- E iai monike o lo latou valaauina o le sue lea ma faaoo le oti i e taumafai e faaolaola lea tala
- Peitai, o le faaogaina e Dan Brown o lenei sosaiete o le Opus Dei, o se mea ua ou taua lava e au, o se mea ua soona tele ni mea faatupu ma sese ua ia faaopoopo i ai.

1. E moni Dan Brown, o lenei sosaiete o se sosaiete a le lotu Katoliko. Peitai o lenei faalapotopotoga e leai sona sootaga ma le manatu e taumafai e tape se tala moni agai ia Iesu.
2. O le Opus dei o se sosaiete faatoa faatuina i Spain i le tausaga e 1928 e le Patele Katoliko e suafa ia Jose Maria Escriva, i lona lagona e tataua ona faamamafa pe tau faaolaola le 'ola paia' o tagata lotu lautele (lay holiness). Na faapea ona tuputupu lenei sosaiete ma na o gatasi lea ma suiga a e lotu Katoliko na faatauaia i le Vatikana II. O lea na aloaia ai loa e le Pope ma le Vatikana lenei faalapotopotoga. Ma ua sosolo ma ola lenei faalapotopotoga.
3. O le tausaga e 1975 na maluu ai Patele Escriva le na amataina lenei sosaiete, peitai e lei pe ai lona faamoemoe.
4. O le tausaga e 1982 na aloaia ma faauuina ai loa e Pope Ioane Paulo II le Opus Dei, ia ave ma sosaiete i lalo o lona faamalumaluga.
5. Ma i le tausaga e 2002, ina ua atoa i ai le 26 tausaga talu ona maluu o Patele Escriva na aloaia ai loa ma talia Escriva e ave ma 'Saint' – "saint of ordinary life."

E tusa ai la ma le talafaasolopito o lenei sosaiete, e leai lava sona fesootaiga ma le manatu o Dan Brown, o lenei sosaiete na faatuina ma o loo taumafai e tape ma faatamaia ni tala e faatatau ia Iesu. O le Opus Dei, e le o i ai foi ni monike. O le toatele o nisi o loo i totonu o lenei sosaiete o tagata ua faiaiga, ua iai a latou fanau, ma o loo galulue foi i ni galuega lelei. I lo latou talitonuga ua aoga tele aoga a le Opus Dei e faamamafa ai le ola paia, e le gata i totonu o lo latou aiga, ae faapea foi i totonu o galuega ma sosaiete o loo galulue ai. E pei o le 'discipline' ma le ola fesoasoani i nisi. O le uiga o upu 'Opus Dei' o 'Galuega a le Atua. Ma o se taumafaiga e faataua le galue o le tagata i totonu lava o lona siosiomaga ina ia faaalua ai le alofa o le Atua i isi. O le toatele o tagata e i totonu o lenei sosaiete o tagata lotu, e le lavea i lalo o le saofaiga o tagata paia e pei o Patele, Tamaitaisa, Epikopo ma Pope. O lona uiga o se auala lea e faataua ai le ola paia i tagata uma ma e le taualoa. E moni Dan Brown e faaogaina e le Opus Dei ni faiga e faatigaina ai le tino, e pei la o uaea maamaa e fusi

i le vae poo le lima, faapea ma ni sasa. Peitai o nei mea e le oo i se ogaoga e pei ona aumaia i le tusi a Dan Brown.

I se aotelega o lenei sosaiete, e foliga mai ai ua faaaogaina e Dan Brown lenei faalapotopotoga taua a le lotu Katoliko i se auala taufaasese e taumafai ai e faasao ona manatu o loo tau faufau. I se faamatalaga a se tasi o loo avea ma sui o lenei sosaiete, ina ua faitau ma matamata i le ata tifaga, ua na leiloa pe ata pe ita i le tele o mea ua soona faaopoopo ma valiina e Dan Brown i luga o lenei sosaiete.

FITAFITA O LE MALUMALU:

O Fitafita o le Malumalu, o le igoa lea ua faapuupuuna ai le autau poo le sosaiete ua faaigoaina o le Fitafita a Iesu ma le Malumalu i Ierusalem [Knights of Jesus and the Temple in Jerusalem]. Na amataina lenei sosaiete e Fitafita [Knights] i lalo o le ta'itaiga a Hugues de Paynes, Na ofoina atu la latou tautua i le ta'ita'i o le Ekalesia i Ierusalem, i le tausaga e 1118 TA. O le Fitafita o le Malumalu, na amataina e i latou na auai i le vaegaau lona lua na faapotopotoina i lalo o le fu'a a le 'Autau Kerisiano' [Christian Crusades]. Ua latou tauto e puipei i tagata Kerisiano uma e faimalaga atu i Ierusalem ma isi vaega o le nuu Paia. Na amata lava lenei sosaiete e Fitafita [Knights] se to'a 9, ae le'i to'atele nisi na mafuta atu iai ona o le faigata o tuutuuga ma tulafono – e pei o le nofo toatasi, o le ola mativa, ma le auaua ususita'i. O le Monike e suafa ia Bernard Clairvaux na ia fausia ni tulafono e fai ma taiala a le Fitafita o le Malumalu i le 1127 TA. O le faaaliga lea o lona lagolago tele i le faamoemoe o lenei sosaiete. O le lagolagoina e Bernard Clairvaux o le Fitafita o le Malumalu na toatele ai loa tagata mai aiga taualoa na avea ma fitafita o lea sosaiete. E le gata i lea, o i latou sa le mafai ona auai atu – na ofoina atu faameaalofa le tele o fanua ma tupe e lagolagoina ai le taumafaiga a le Fitafita o le Malumalu. Na avea le Fitafita o le Malumalu ma sosaiete malosi ma le mauoa. Na tuu atu foi iai ma le lagolago malosi a le Pope, atoa ma tupu ma tamalii o le tele o atunuu o Europa. O lea lagolago sa faatino i le foaiina atu o tupe ma fanua mo le Fitafita o le Malumalu. E le gata i le avea o le Fitafita o le Malumalu e leoleoina le saogalemu o tagata feoa'i atu i le nuu Paia, ae na faalautele la latou tautua i mea tau feafaatauaiga.

E lua selau tausaga o tautua pea le Fitafita o le Malumalu i atunuu eseese o Europa, ae maise lava Ierusalem, Roma, Farani, Sepania, Potukale, ma malo i Sasa'e Tutotonu. E le gata i le tele o le oa, ae ua avea foi i latou ma malosiaga i totonu o le malo ma le lotu, ma vaega eseese o le olaga. Ua sili atu lo latou mauoa, ma lo latou amanaiaina, i lo le tele o tupu ma tamalii o Europa. O le mafuaaga lea, ae maise lava le oa, na faufau leaga ai loa le tupu o Farani, o Philip IV, e tineia le Fitafita o le Malumalu. Na silafia lelei lava e Philip IV e faigata ona ia faaoolima i le Fitafita o le Malumalu ona sa i lalo o le puipuiga a le Ekalesia Kerisiano [Pope]. I le 1307 TA, na faatino ai loa e Philip IV le tineia o le Fitafita o le Malumalu ina ua ia mafai ona ia faatalitonu le

Pope o Clement V, o le Fitafita o le Malumalu o se sosaiete e le talitonu i le Atua; latou te faatino faiga faataulaitu ma faiga faasatani. Ua faigofie ia Philip IV ona faatauina le faatuatuaaga o Clement V, auà o ia lava na faatuina Clement V e fai ma Pope, atoa ma le siitia o le nofoaga o le Pope mai Roma i Aviniona. Ua fai le pule a Philip IV auà ua faatauina le tofà a le Pope. E iva moliaga pepelo na fauina e Philip IV na faatulafonoina ina ia saisaitia ai sui o le Fitafita o le Malumalu, faamasinoina ai, ma faasalaina ai i le oti, ae fao a latou oa. O moliaga nei:

- Latou te faatauto i fitafita fou e teena Keriso, o le Atua, ma le au Paia
- E faia uiga mataga i le satauro ma ata o Iesu
- O e faauuina fitafita fou, latou te sogi i le gutu, o le pute, ma le ti'a o sui fou
- A'oa'oina fitafita fou e aua le talitonu i sakarameta
- E tapuai i le pusi poo le ulu o le pusi
- E fai amio faasotoma
- E faamagalalo e le taitai o le Fitafita o le Malumalu agasala
- E fono faalilo i taimi o le po
- Faaoga auala faagaoui e maua ai fanua ma a latou oa

I le aso 19 Mati, 1314 TA, o le taitai mulimuli lava o le Fitafita o le Malumalu, Jacques de Molay, na susunuina ina ua ia teena [ua ia le ioe i] molimau ua faasaga ia te ia. O se tasi o tala tuu e faapea ao susunuina ia Jaques de Molay, sa ia faamalaia ia Philip IV ma Pope Clement V – e latou te feiloai i le oti ao le'i uma le tausaga. Tasi le masina mulimuli ane ae oti Clement V, ae valu masina oti Philip IV – e le'i aoga ia te'i laua le oa a Fitafita o le Malumalu.

Tele tuuaiga o le Fitafita o le Malumalu. Ao faamaumauga i le talafaasolopito, o loo manino ai lava, na ala ona tafiese le Fitafita o le Malumalu ma fasiotia ona e leai ma nisi na teena lo latou faatuatuaaga i le Keriso Toetu Manumalo ma le Atua. O i latou foi na ioe i mea ua tuuaiga ai i latou, na faasaoloto ae na toe foi lava i le Fitafita o le Malumalu e galulue ma sa toe saisaitia ma faaoo iai le oti. I le lua selau tausaga o le Fitafita o le Malumalu, e leai lava ma se tuuaiga na tuuaia ai lo latou leoleoina o ni mea lilo, ae maise lava le Ipu Paia [Holy Grail] – poo ni faamaumauga poo ni tusitusiga e uiga i se gafa o Iesu. E sa'o Dan Brown i lana tusi o le talafaasolopito o le Fitafita o le Malumalu na tineia e le Pope o Clement V, ae galo ai ia Dan Brown ona taua Philip IV, o ia lea na amataina tuuaiga pepelo ona o lona mana'o lasi i le oa. Ua le taua Philip IV e Dan Brown, ona e faamaonia ai o tuuaiga na tuuaina ai Fitafita o le Malumalu, ma e leai ma se fesootaiga ma se gafa o Iesu e ala ia Maria le Makatala. Ua ta'u na'o Pope Clement V, ona e faamalieina ai ma faamaoniaina ai le tautoga a Dan Brown o le Ekalesia Kerisiano, e ala i le lotu Katoliko, sa latou tineia le tala sa'o e uiga ia Iesu ma Maria le Makatala. A ta'u e Dan Brown le suafa o Philip IV – ma tautino o ia na taulamua – ona le aoga atoa lea o lona talitonuga, ma lana talafaasolopito o le Ekalesia

Kerisiano. I le tele foi o faamauga o le tala faasolopito o tupu o Farani ae maise le Vatekana – e leai lava ma se iota o loo taua ai sa iai se tupua faalilolilo sa tausia e le Fitafita o le Malumalu – e oo lava i tusitusiga a le Fitafita o le Malumalu e leai lava se tala e faia i lea tulaga.

MONASETERI O SIONA:

O le talitonuga o Dan Brown, o le vaega lea sa latou tauaveina le puipuia o le Ipu Paia – le gafa o Iesu e ala ia Maria le Makatala – ina ua tineia e le Ekalesia Kerisiano le Fitafita o le Malumalu. E faapea na faatua lenei sosaiete i le tausaga e 1099 TA. O lenei sosaiete o loo latou puipuia le gafa o Iesu ma Maria le Makatala e oo mai i ona po nei, ona o loo taumafai pea le Ekalesia Kerisiano, ae maise lava le Lotu Katoliko, e tineia. O le 1965 na faalauiloa ai e le National Bibliography a Farani le iai oni tusi taai e taua o le *Les Dossiers Secretes* [The Secret Dossiers] o loo taua ai nisi o taitai o le Monasteri o Siona mai le 1099 seia oo mai i le taimi nei. O tusitusiga nei ua talitonu ai Dan Brown, i le talitonuga i le gafa o Iesu. O nisi o tagata lauiloa sa avea ma taitai o le Monasteri o Siona e aofia ai Issac Newton, Botticelli, Victor Hugo, ma le tusiata lauiloa o Leonardo da Vinci. Ua ou faaliliuina le *Priory of Sion* o le Monasteri o Siona, ona o le manatu o Dan Brown, o lenei sosaiete na faaigoaina i le mauga Paia i Ierusalem [Mt Zion] le nofoaga o le Malumalu i Ierusalem. O le faaagoina o le upu *Priory* e Dan Brown, o loo faaagoina i lona uiga – o se nofoaga mo monike. O lea ua ou faaliliuina ai o le Monasteri ona o le ituaiga nofoaga ia e nonofo ai Monike – ma o le agaga foi lea o Dan Brown – ina ia faamaonia ai o le sosaiete lea o le Monasteri o Siona, na amataina e Monike, i le Mauga i Siona i Ierusalem, e tete'e atu ai i talitonuga o le Ekalesia Kerisiano o loo i lalo o le vaaiaga a le Pope – e manatu i latou e sesē.

O le fesili e tulai mai – afai e moni le talafaasolopito a Dan Brown – aisea na amataina ai le Monasteri o Siona i le 1099, ae ave le puipuia o le Ipu Paia i le Fitafita o le Malumalu? E le fesootai le talafaasolopito a Dan Brown ma le talafaasolopito a le Ekalesia Kerisiano. E foliga mai na muamua amataina le Monasteri o Siona ae mulimuli faavae le Fitafita o le Malumalu – a'o lea faatoa tuu atu le leoleoina o le Ipu Paia i le Monasteri o Siona ina ua tineia le Fitafita o le Malumalu i le 1314 TA. Aisea na le tuu atu ai le vaaiaga o le Ipu Paia i le Monasteri o Siona i le taimi na faavae ai? E mafua ona o le Monasteri o Siona e le o maua i talafaasolopito o le Ekalesia Kerisiano ma le lalolagi, aua e le'i iai se sosaiete faapea na iai – faatoa faavaeina i le 1956 e Andre Bonhomme ma Pierre Plantard. Ae o le leai o se suesuega auiliili a Dan Brown na faia i le tala faasolopito ole Ekalesia Kerisiano, ua ia le iloaina ai le feteenaiga o lana tala e uiga i le Monasteri o Siona ma le tausaga amata o le Fitafita o le Malumalu.

O tusi taai – Secret Dossiers – ua maua foi i suesuega na fausia i le mafafau o Noel Corbu i le 1953. O Corbu na ia maua ina [inherit] le

esetete a le Patele of Sauniere – faapea o ia lea sa ia iloa ma puipuia le Ipu Paia mo se vaiataimi, ma o ia foi o se sui o le Monasteri o Siona. Na faia e Corbu le tala na maua tusi taai i totonu o pou o le falesa o loo i totonu o lona esetete. E toatele e lei talitonu i le tala a Corbu ona e tele mea e feeseesea'i ai ma tala faamaumauina i le talafaasolopito o lea esetete ma le olaga o Patele Sauniere. O le manatu o le toatele na fausia lenei tala e Corbu ina ia tosina atu ai tagata i lona faleaiga fou i totonu o lea esetete. E leai ni tusi taai na vaaia na'i o tala lava a Corbu na faalele. I se vaiataimi o le 1960 – na toe faamalosi ai e Plantard le talafatu e uiga i le Monasteri o Siona, ma toe faaolaola ai le fesootaiga o Patele Sauniere ma le Ipu Paia, atoa ai ma le taumafaiga o le aiga tupu [Merovingian] o Farani e puipui le Ipu Paia. O le taimi foi lea na ia tautino ai o le Monasteri o Siona na amataina i le taimi o le Autau Kerisiano [Crusaders] e Godfrey de Bullion. O Bullion o ia lea sa ia taitaiina le vaega muamua lava o Autau Kerisiano. O loo iai le talitonuga o le amataina o le Fitafita o le Malumalu, sa tele se sao Bullion i lona faavaeina. O le fesootaiga lea o le Monasteri o Siona ma le Fitafita o le Malumalu. O le vaiataimi foi lea na feiloai ai Pierre Plantard ma Corbu – ma manatu ai loa e tusi se tusi e uiga i le tala a Corbu – e ui lava na ia iloa e manogi pepelo. Ae peitai e lei maua se lomitusi e lomia ona e iloa uma lava e tagata e le moni lea tala. O le mea ua faia, ua tusia loa ni tusi taai e Phillipe de Cherisey [uo a Plantard] ma momoli i le National Bibliography i Pare, o tusi taai na tusia e Patele Sauniere. O le mauaina o nei tusi taai na ofoina ai loa Gérard de Sede i le 1967 na te toe teuteuina le tusi a Plantard, ma ona ia lolomiina. E oo atu i le 1970, e lei maua lava se tupe a Plantard ma Cherisey mai le tusi, ae maise lava Cherisey e lei maua lava foi ma se tupe i lona tusia o le Secret Dossier. Na feeseesea'i Sede, Plantard ma Cherisey, ma na iu ai ina toe tautino e Plantard ma Cherisey o tusi taai o le Secret Dossier o se fausaga o laua mafafau [figment of their imagination] – e le moni. I le 1989 i se faatalatalanoaga ma le BBC a Peretania na toe taua ai e Plantard e le moni tusi taai ia na tuuina atu i le National Bibliography i Pare. Na toe taua foi ise isi faatalatalanoaga ma le BBC i le 1996 lea lava manatu. Mo le silafia, o Plantard ua tele ona moliaga faaletulafono ona o le pepelo ma le taufaase'e, atoa ma le taumafai e su'e tupe i auala pepelo ma le faamalosi [con man].

O le Monasteri o Siona e leai sona fesootaiga ma le aai Paia o Ierusalem, poo ni Monike o le aai Paia. Na faaigoaina lenei sosaiete i se mauga i le tama'i aai i St Julien, Farani, e igoa o Col du mont Sion [Mount Sion]. E leai sona fesootaiga ma le Autau Kerisiano [Crusaders], o le Fitafita o le Malumalu, poo se isi lava faalapotopotoga e fesootai ma le igoa Siona. Ua tautino foi e Pierre Plantard e leai lava ma se mea lilo o loo ia puipui ae maise lava se gafa o Iesu. O ia foi e le tau sona gafa ia Iesu. O le faamoemoe lava na fausia ai tusi taai ina ia mafai ona fesootai ai le gafa o Plantard ma le gafa o le aiga tupu o Farani [Merovingian Kings], ae maise Dagobert II o le tupu mulimuli lea o Farani a'o lei faoa faamalosi e le laina o le aiga tupu o le Carolingian Kings. O se taumafaiga a Plantard e tau atu i tagata

Farani o ia o le suli moni lava o le aiga tupu moni o Farani. E moni sa iai le sosaiete e taua o le Monasteri o Siona [Priory of Sion], ae leai ma se totoga o le tala faasolopito a Dan Brown i lana tusi o le *Da Vinci Code* e uiga i lea sosaiete e moni. Ana moni – e iai lava se tala a le talafaasolopito a le Ekalesia Kerisiano e faia i ai. E leai foi se iloa e le Fitafta o le Malumalu o le Monasteri o Siona. Ana iai foi se sosaiete faapea i le vaitaimi o le Fitafta o le Malumalu, e tatau lava ona i ai se tala a le Inquisition [o e puihua le faatuatuga ma talitonuga o le Ekalesia Kerisiano mai mafauauga sese] ona o se sosaiete sa gafa ma mea lilo ma talitonuga e le lagolagoina e le Ekalesia Kerisiano. Sa tatau fo'i ona mauaina lea sosaiete i laupepa o le tala faasolopito – a le o le Ekalesia Kerisiano – a'o le talafaasolopito o le lalolagi.

Saunia e: Rev. Dr Featuna'i B. Liuaana, Rev. Aukilani Tuia'i, Rev. Latu Latai (MTC).
(E toe faaauaina)

Ekalesia Soofaatasi a le Lalolagi: (The Unification Church):

2. O le Fofoaga a le Atua

O le talitonuga fa'akerisiano, na faia e le Atua mea uma mai le leai ose mea (*ex nihilo – out of nothing*). O le talitonuga o le Ekalesia Tu'ufa'atasia, o mea uma na faia e le Atua, na sau i fafo mai totonu o le Atua. E talitonu Muni e tu'ufa'afesaga'i mea uma o le olaga – e fa'apena fo'i le Atua. E iai le fafine ma le tane. E iai mea moni ma mea sesé. O mea uma lava e iai lona itu i totonu [*Sung Sang*] ma lona itu i fafo [*Hyung Sang*]. E fa'apena fo'i mea uma o le fofoaga. O mea ua va'aia i fafo o le ata lea o mea uma o lo'o i totonu o le Atua. O le faia o le tagata i le fa'atusa o le Atua o le tane ma le fafine – ua fa'a'ailoa mai ai o le Atua e iai lona itu tane ma lona itu fafine.

3. O le Pa'ú o le Ulua'i Tagata & Agasala

Na faia e le Atua le ulua'i tagata e leai se agasala. O le tane na faia ina ia aupitosili ona latalata i le Atua i se mafutaga e ato'atoa lona lelei [perfect]. I lenei mafutaga, o le matáfaioi a le tane o le fa'a'ailoa mai lea o uiga o le Atua ma lona paia, ona fa'apena lea ona fa'a'ailoa atu e le tane i le fofoaga atoa le Atua paia. O lenei matáfaioi a le tane e fa'ataunu'uina e ala i ni fa'amanuiaga se tolu. O le fa'amanuiaga muamua – o le avefa ma tagata ato'atoa [perfect], auà e ato'atoa le Atua. O lona lua o fa'amanuiaga – o le fa'aipoipo lea i se fa'aipoipoga ato'atoa [perfect marriage], ona maua ai lea o fanau e ato'atoa, e leai ni à latou agasala [sinners children]. O lona tolu o fa'amanuiaga – o le pulea lea e le tane o mea uma i le fofoaga – o le fa'a'ailoga lea ua fa'atúina ma fa'amautúina le mào o le Atua i le lalolagi. O lona uiga, o le fa'amoemoe o le Atua mo le ulua'i tagata, o Atamu ma Eva, ia nonofo fealofani o se tuagane ma se tuafafine se ia o'o i lona taunu'uga e ato'atoa ai (perfect), ona fa'atoà fa'aipoipo ai lea, ma fanafanau, ma amata ai loa le mào o le Atua i le lalolagi.

Ae peita'i ua pa'ú le ulua'i tagata ona o tu'inanau o le tino, ua feusua'i a'o le'i o'o i le taimi fa'atulagaina. O le fa'aoso'osoina e Satani o Eva, o le agasala muamua lea – na feusua'i ai Satani ma Eva i le feusua'iga fa'aleagaga, ona toe agasala fa'alua ai lea o le tagata i le feusua'iga fa'aletino i le va o Atamu ma Eva. O lona uiga ua lé fa'ataunu'uina e Atamu ma Eva le finagalo o le Atua ua uma ona fa'ata'atia – o le avefa lea o Atamu ma Eva ma mātua moni [true parents] o tagata o le lalolagi. Ina ua pa'ú le ulua'i tagata, sa ia Atamu pea le lelei ma le leaga. Ona tu'uese'eseina lea e le Atua o le lelei ma le leaga, e ala i atalii e to'alua o Atamu, o Kaino ma Apelu. E talitonu Muni, ana fa'apea e usita'i ma ifo Kaino ia Apelu, o i'ina e mamà ai lava le aitalafu e tatau ona totogiina mo le agasala ua faia.

Ae peita'i ua fasiotia e Kaino lona uso o Apelu, ma ua ave'esea ai le avanoa e totogiina ai le agasala. Na saili le Atua ia Aperaamo ma lona aiga mo le totogiina o le agasala – ae peita'i na agasala fo'i Apera'amo. Na saili fo'i le Atua ia Mose, ae peita'i e le'i manumalo Mose. O le mafua'aga lea na auina mai ai loane le Papatiso ma lesu Keriso le Mesia Fa'aola. O le fa'amoemoe, ia tautua loane ia lesu, ma fa'apotopotoina e loane ni tagata se to'atele e tautuaina lesu. Ae peita'i e le'i mae'a le galuega na tu'uina atu ia lesu – ona ua fasiotia o ia.

O le talitonuga o Muni, o le agasala a le ulua'i tagata e tu'ufa'asolo e ala i le toto ae le o se filifiliga a le tagata e agasala ai. Mo le tagata ina ia fa'aolaina mai le agasala a le ulua'i tagata, e mana'omia se fa'aolataga fa'aletagata [physical] – e ala i le fanafouina, po'o le fa'amamaina fa'aleagaga, i le ofoina atu lea o le tagata atoa ia Muni, o ana oloa ma ana oa, ma tu'u atu le fa'atuatuga ia Muni e filifilia o latou ta'ito'alua fa'aipoipo, atoa ai ma le fa'apaiaina e Muni o lea fa'aipoipoga.

4. O Fanau lé Agasala

O se tasi o fanau a Muni ma lona to'alua o le ali'i lea o Hyo Jin Moon. Na ola a'e lenei ali'i i se aiga mauoa ma se olaga faigofie e maua so'o se mea e mana'o iai le loto. O Hyo Jin e mafai ona fa'apea e leaga lona faiga (spoilt) mai lona laitiiti. Na fa'afa'aipoipoina Hyo Jin e lona tama, ae peita'i i le 1995 na sola ese ai lona to'alua o Nansook Moon ma ave le la fanau e to'alima. O le fa'amatalaga a Nansook, o le pologa ia o lona olaga, ma e le gata ina fasi o ia e lona toa'lua, ae o le pologa fo'i ia o lona loto, aemaise lava le taumafai e o'ono le fa'aogaina e Hyo Jin o fuala'au fa'asaina, atoa ai ma le fiafia i ata matagá [pornography].

O Hyo Jin o se fa'afitauli lea ua tula'i mai mo Muni ma le Ekalesia Tu'ufa'atasia ma ana a'oa'oga. Auà afai o Suni Mauni Muni o le Mesia lea e leai sana agasala, o le Atamu lona tolu na auina mai e le Atua e fa'aola le lalolagi, o lona tofiga mai le Atua o le fa'aipoipo i se tama'ita'i ato'atoa ona lelei – o Hak Ja Han Moon – ma fanau mai ia te'i laua ni tamaiti e lé agasala, ma o lea fo'i ua amata ona iai le mào o le

Atua i le lalolagi, ona faigatà ai lea o uiga matagà o lo'o faia e Hyo Jin le atalii matua e leai se agasala.

O le va'ai a tagata i le olaga agasala o le fanau a Muni, ua mapuna a'e ai se fa'afitauli mo le Ekalesia Tu'ufa'atasia i ana a'oa'oga – o Muni o le Atamu lona tolu – o le Alii o le toe afio mai – ua fa'aipoipo ma o lana fanau e le agasala – ma o i latou e pogai mai ai le malo o le Atua i le lalolagi. E fa'apea uma le fanau a Muni ma Hak Ja Han, a'o Hyo Jin ua sili ona matuia ona uiga. Ua taumafai nisi o le Ekalesia Tu'ufa'atasia e tu'ua'a le leaga o Hyo Jin i le tu'ufauina a'o la'ititi, ona o le pisi o ona mātua mea fa'alelotu. Ua tu'ua'ina fo'i le leaga o le olaga o le fanau i le leaga o le sosaiete i Amerika. I le 1992, na fa'aailoa ai e Muni, a o'o ina oti, o lona to'alua o Hak Ja Han Moon o le a sui tulaga ia te ia e ta'ita'ia le Ekalesia.

5. O le Atua le Tama

E a'oa'oina e Muni, o le Atua e iai lona itu tamàloa (masculine) ma lona itu fafine (feminine) i luga o lona talitonu e tu'ufa'afesaga'i mea uma. O lea talitonuga i le Atua e latalata i letalitonuga fa'a-Konefiusa (Confucianism), Taoisi (Taoism), ma le Hinitu (Hinduism)... o le iai lea o itu fa'afesaga'i o le Atua (polarity) e foliga ai e vaeluaina le Atua.

6. O Iesu Keriso

E te'ena e Muni le itu fa'aleagaga o Iesu Keriso. E tete'e fo'i e Muni o Iesu Keriso, le alo o le Atua. O Iesu Keriso ua na'o se tagata – tamàloa – ae lé o le Atua. E pei lava Iesu Keriso o oe ma a'u – e le mafai ona avefa ma Atua. O Iesu Keriso e le'i fanau mai se taupou, a'o se tama o le pó (illegitimate) a Sakaria ma Maria. Ua a'oa'oina fo'i e Muni, e le'i mae'a le galuega a Iesu Keriso na auina mai ai i le lalolagi – ia fa'aipoipo ma uluola e ala i fanau ua ato'atoa e lé agasala (perfect children) e tutupu mai ia te ia. Ae peita'i, na fasiotia Iesu Keriso a'o le'i fa'ataunu'uina lana galuega na sau ai i le lalolagi. O le satauro e le o se vaega lea o le fuafuaga lautele a le Atua. Mo Muni lava ia, o le satauro o le fa'aailoga lea o le faiaina mo le lotu Kerisiano. E talitonu Muni e le maua e se tagata le fa'aolataga e ala i le satauro, auà ua na'o se fa'aolataga fa'aletino e le'i mae'a - e lé ato'atoa.

E faitioina i a'oa'oga a Muni loane le Papatiso mo le malii o Iesu ona ua le ato'atoa fo'i ona fa'ataunu'uina lana galuega, o le liliuina o tagata ma ona so'o e fai ma malosi e lagolagoina Iesu Keriso. E talitonu Muni, e le'i toetu Iesu i le tino, ae na toe fo'i i le lagi o se agaga. O le mea lea e mana'omia ai se Atamu lona tolu e toe fa'ataunu'uina fuafuaga a le Atua mo le fa'aolataga o le tino e ala i le fa'aipoipo ma fanauina ni fanau e lé agasala. O le talitonuga o le Ekalesia Tu'ufa'atasia, o Suni Mauni Muni o ia lea o le Atamu lona tolu.

7. Fa'aolataga

O le fa'amoemoe o le Atua ia fa'atúina lona mào i le lalolagi. E ui ina

le taunu'u le fa'amoemoe ona ua agasala Atamu ma Eva, ae le mafai lava ona tolopoina le finagalo o le Atua. Ma e fa'ataunu'uina lava le finagalo o le Atua na tu'uina atu ia Atamu ma Eva e se isi tagata. O lea tagata e tatau ona ia maua le ato'atoa lelei (perfect and sinless), ma fa'aipoipo atu i se tama'ita'i ato'atoa (perfect and sinless), ma la maua se fanau e ato'atoa ona lelei ma lé agasala (perfect and sinless). O le amataga lea o le mào o le Atua i le lalolagi. O le Mesia fou lea, e filifilia e le Atua, ma auina e fa'ataunu'uina le fa'amoemoe na lé mafai ona fa'ataunu'uina e Iesu. O le Mesia lava lea e togiina le aitalafu o le agasala a le ulua'i tagata.

8. O le Agaga Paia

O le Agaga Paia e le ese mai le Atua le Tamà, e pei ona talitonu i ai Ekalesia Kerisiano. O le Agaga Paia o le malosi lea i tua o galuega fa'atino a le Atua. O le Agaga Paia o le Agaga Fafine, ae peita'i e lé gata ina iai lona itu fafine, e iai fo'i ma lona itu tamàloa. E lé va'aia e mata ae o lo'o lotolotoi i totonu o mea uma - e sau e pei o se malamalama tele - po'o se malosi fa'amaneta. E talitonu fo'i le Ekalesia Tu'ufa'atasia, o le Agaga Paia – talu ai ona o le Fafine lona kenera – o ia o le Tina Moni ma le tina fa'alegaga o Iesu Keriso. O le Tina Moni (True Mother) i le a'oa'oga a le Ekalesia Tu'ufa'atasia, o le to'alua lava o Muni – Hak Ja Han – o lona uiga o le to'alua o Muni, o le Agaga Paia lava lea, o ia o le Eva lona lua.

9. O le Tolu Tasi Paia

E te'ena e Muni le talitonuga o le Tolu-Tasi-Paia, ae fa'aogaina ma fa'auigaina e Muni mau o lo'o i totonu o le Tusi Paia e uiga i le Tolu-Tasi-Paia e fa'amaonia ai ana a'oa'oga e uiga i le Atua ma Iesu Keriso. Ua a'oa'oina e Muni, o le Atamu lona tolu ma lona to'alua [Hak Ja Han], ma le Atua, o le tolu-tasi-paia muamua lea, ma o le a toe fa'aleleiina ma toe fuata'iina le lalolagi o tagata pea fausia isi tasi-tolu-paia e ala i mafutaga a le Atua ma i latou e fa'aipoipo i lalo o le Ekalesia Tu'ufa'atasia.

10. O le Toe Afio Mai

E te'ena e Muni e toe afio fa'alua mai Iesu. Ae peita'i o le a auina mai e le Atua se isi tagata, o le Atamu lona tolu lea. E fanau mai o ia e pei ona fanau mai Iesu i le lalolagi. O le mào o le Atua i le lalolagi o le a fa'atúina lea e le Atamu lona tolu. O le talitonuga o le Ekalesia Tu'ufa'atasia – o Suni Mauni Muni, o ia lava lea o le Atamu lona tolu, ma ua amata nei ona ia fa'atúina le mào o le Atua i le lalolagi.

Fai mai le ta'utinoga a Muni: "O le Atua o lo'o ola i totonu ia te a'u." Ua ta'utino fo'i: "O a'u o le Atua liutino tagata." Ua tava fo'i e Muni, e le'i uma le galuega a Iesu na sau e fai, ae peita'i o ia (Muni) o le a manumalo ma fa'ataunu'uina le finagalo o le Atua e pei sa fa'amoemoe ai ia Iesu Keriso. O lona uiga, ua ta'utino lava e Muni o ia o le Mesia o le toe Afio mai Fa'alua. Ua talitonu le Ekalesia Tu'ufa'atasia, o Suni Mauni Muni ma lona to'alua [Hak Ja Han] o Matua Moni (True

Parents) ia o tagata uma, ma o i laua o le fa'apogai lea o le ato'atoaga o fuafuaga a le Atua na fa'ata'atitia i le amataga.

11. O le Lagi ma Seoli

O le lagi o se vaega o le lalolagi o Agaga. O seoli e leai sona taua auà e o'o ina mavae atu ma le toe iai pe a o'o ina lautele ma manumalo le lagi ma fa'aolaina tagata uma. O le alu o le tagata i le lagi po'o seoli e fua lea i le ituaiiga olaga na ola ai le tagata i le lalolagi. O le olaga fo'i e ola ai le tagata i le lagi e leai lava se ese'esega ma le olaga na ola ai i le lalolagi - e i ai lava tu'inanau, o mea e lé fiafia ai, ma fa'amoemoe ma manatunatuga lelei.

O Nisi o Saunoaga Tu'usa'o a Suni Mauni Muni:

"O lo'o ola le Atua i totonu ia te a'u ma o a'u o le Atua liutino tagata... o le lalolagi atoa ua i o'u lima, ma o le à ou fa'ato'ilaloina ma fa'apologaina le lalolagi."

"O le taimi nei o lo'o lila'iina ma ave'eseina e le Atua le fa'akerisiano, ae ua ia fa'atúina se tapua'iga fou, ma o lea tapua'iga fou o le Ekalesia Tu'ufa'atasia."

"O Kerisiano uma i le lalolagi ua iai le fa'amoemoe e miti'ia e là matou talitonuga."

"Ua tele tagata paia, o perofeta, ma ta'ita'i fa'alelotu ta'uta'ua i le tala fa'asolopito o tagata. A'o Muni, e sili atu i lo nei tagata uma, e silisili fo'i i lo Iesu."

"O a'u (Muni) o le Alefa ma le Omega, o le amataga ma le gata'aga."

"O le Atua ma le tagata e tasi. O le tagata o le Atua liutino tagata."

Saunia e: Rev. Dr Featuna'i B Liuaana (MTC).
(E toe faaauauina)

Tala Faaauau o le Galuega
Faamisionare i Zambia.

OLE VALA'AUINA O SE TASI O AATALI I FA'ALEAGAGA E FIAA'OTAU MO LE GALUEGA.

E fa'alogoia pea i le Au Faigaluega le fiafia pe a avea se tasi mai le nu'u e vala'auina e fai ma a'oa'o ma fasolosolo atu lava lea i le avea ma faife'au i le galuega. O se lagona fo'i fa'apea na o'o iai ma'ua ina ua tula'i mai se tasi o lenei aulotu ma fa'a'ailoa mai lona mana'o e fia a'oga Fa'afai'au. O lenei ali'i na sau e fa'a'ailoa mai lona mana'o e tai tutusa lava o ma matutua i lea vaitaimi. I lea taimi sa 27 o'u tausaga ae 24 ia. O le sauni atu ose tasi e fai ma a'oa'o i lea matua o ona tausaga, e masani lava ona ofo mai ona ua iloa e sea tagata ua leai lava se galuega e mafai ona alu iai. E pei lava o se mea mulimuli

lea e tapa iai ina ua iloa lava e leai se galuega e maua i se isi mea e ese mai galuega masani ae maise lava galuega fa'aofisa mo e e tau feololo a latou a'oga.

OA'OA'O E TOTOGI E OEA'O'OGA.

O se tasi lea o tulaga e faigata ai ona maua nisi e maua tele atu lo latou a'oa'oina e tosina mai i le galuega. I fa'atalanoaga sa faia ma nisi, e foliga lava o le leaga o totogi o le Au Faigaluega se tasi o mafua'aga e ala ai ona fa'apea ona le avea le faife'au ma se mea e tosina iai manatu o tupulaga. E moni lava e le o le mafua'aga lea e ao ona tali ai se tasi mo le galuega ae tele fo'i ina manatu i latou nei mo le tausiga o latou ma o latou aiga a'o iai i le galuega. I se tasi o itu e fa'alagolago fo'i le Ekalesia ma le to'atele o e talia i le a'oga Fa'afai'au i le tupe fa'aagaaga mo le tausiga o a'oa'o ua talia i le a'oga i lea tausaga ma lea tausaga. E amata lava mai le Kolisi Fa'afai'au ona totogi i latou e le pei o a'oga fa'afai'au i le tele o itu o le lalolagi e totogi e le a'oa'o tupe e a'oga ai, ae o lenei Kolisi e totogi e le Ekalesia tupe i a'oa'o ma o latou aiga e tausi ai i latou pe a talia e avea ma a'oa'o. O le mea moni afai e totogi e le a'oa'o i le Kolisi pili o le a'oga e leai ma nisi e o mai i le Kolisi e a'oa'oina ai. O tupe e maua e le a'oa'o e fa'alagolago lea i le to'atele o le aiga o le a'oa'o.

Ina ua logoina ma'ua e le atali'i e pei ona ta'ua i luga, sa ma sauni loa ma le fiafia. Na pasi lana su'ega ulufale ma amata loa ona sauni mo le a'oga. Sa ma saunia ona lavalava ma isi ana mea mana'omia, ona o le mea ua tupu, ua le fiafia iai ona matua ma le 'aiga ona o ia sa fa'amoemoe iai le aiga i lana galuega i le mainaina o le Kopa (Copper Mines). E usu i le vaveao ae fa'ato'a o mai i luga i le afiafi po. Sa leai lava ma sina pene apa na mamulu mai a le aiga aua le fa'amoemoe. E pei o i na tofo ai loa i le tulaga o lea a'afia ai ma'ua mo le 4 tausaga o le a'oga ai le a'oa'o.

I le amata mai o le a'oga a le atali'i na iloa o ia o se tasi e lelei lona mafaufau, ma o se fiafiaga lea i a'i ma'ua. Na iloa ai lava fo'i e maua atu le mea e o'o iai lona olaga i le galuega, pe avea fo'i ma sikolasipi a le Ekalesia. I vaitaimi e tu'ua mai ai e tu'uina iai le avanoa e lauga ma iloa ai fo'i o se tagata lauga lelei e le gata i la latou lava gagana ae fa'apea fo'i i le Fa'aperetania. Ua avea nei o ia ma 'i'oimata o tupulaga talavou, ae maise ua faia o ia ma failauga tausaga'afia i mafutaga a tupulaga talavou.

UA FIAFA'AIPOIPO LEA'OA'O.

I le amatalia o lona taumafai i lona tausaga mulimuli na logoina ai loa ma'ua i lona fa'amoemoe e fia fa'aipoipo. Sa ma tali atu

iai ua lelei tele, ona e ma te iloa fo'i le mafine o se teine fo'i e tu malosi i mea a le Ekalesia i le fa'alapotopotoga a le Au a Teine (Girls Brigade), ma o se teine lelei tele i le ma'ua va'ai. Sa ou fai iai e alu e logo lo latou aiga ae maise ona matua. Sa leai so ma manatu o le a pa'u le ululu o le la'au ia ma'ua i le faia o le fa'aipoipoga.

Ina ua mavae le 4 masina ae o'o mai le a'oa'o ma lona to'alua fa'aolioli e logo mai e le fia faifa'aipoipoga le aiga o le tama, e o'o lava i le 'lobola' (O le vaega e toto'i i le tama o le teine fa'aipoipo, ona mafai lea ona nonofo ma lona afafine) ua folalima mai ai. Ina ua fesili atu o le tali lava lea i so'o se mea o le fa'aipoipoga. Ia tatou i Samoa nei o le tele o mea e fai i le fa'aipoipoga o le aiga o le teine ae o Zambia e matele lava i le tama mea uma o le fa'aipoipoga. Sa ma o'o i matua o le tama ae fai mai e leai se tupe e fai ai se mea, ona o ia lea sa fa'amoemoe iai.

Sa filogia lagona na iai i lea taimi. Sa logana le ita i matua o le tama (i) Muamua ona o le foliga manatu mamafa i se tasi o mea tupito i le soifuaga o si a la tama. (ii) Sa tau iai le manatu e pei e fa'ataga fa'avalevlea ma pei a tu'u mai e faitalia le faife'au Misionare e tele ana tupe e fai ai le fa'aipoipoga a le la tama. La te le iloa mai, e le tele ni tupe a le Misionare Samoa. E ui i ia tulaga ae sa lagona lava le alofa i le atali'i ona o se tagata muamua lea ua avea ma fua o la ma galuega i Zambia i le tala'iina o le finagalo o le Atua, e pei ona ou lauga so'o ai. O i lava na fesuia'ina ai se lagona ma aga'i loa e faia le fa'amoemoe o le atali'i

TOTOGI MO LE TEINE FA'AIPOIPO

I le itu o le teine, ose teine e lelei lona a'oa'oina ma e mafai fo'i ona taugata le 'lobola' e totogina e le tama. Sa o ma iloa loa ua utia ma'ua i i ona e sa le'i o'o iai le mafaufau. Sa tuliina loa le a'oa'o e o ma lana so'o'upu e fa'atalatalanoa le lobola i le tama o le teine. I le fo'i mai o le la savali na iloa atu lava i le savavali mai le manuia ona o le sagisagi fiafia mai. O le tali o le savali. O le lobola mo le teine e;

1. 5 Palanikeke
2. 2 Oti
3. K 200.00 (E tusa ma le \$300.00 Tala Samoa i na ona po.)

O se tau e matua laitiiti lava pe a fuafua i le atamai o le teine. E fa'afetai i le Atua ona o lenei aiga o se matua aiga lava o le Tala Lelei. Na vave lava ona toto'i le vaega e pei ona mana'omia ina ia vave ai fo'i ona sauniuni mo le fa'aipoipoga.

UAMANA'O IA FAIAFA'ASAMOALE FA'AIPOIPOGA

Talu ai o lenei uo sa fai lava ma o atu i lo ma fale, na va'ai ai

i ata o le ma fa'aipoipoga, ma e sa mana'o ai i le ofu fa'aipoipo o Malu e pei ona iai i le ata. Sa aumai loa le uaealesi i le aiga o Malu ina ia lafo atu le ofu fa'aipoipo mo le fa'amoemoe, ma e sa fa'apena ona fai. O le faia o le sauniga sa manana'o ina ia faia e pei ona iai i le ata o la ma fa'aipoipoga sa pu'eina i le 'video' sa ma o ma ma'ua. E o'o lava i le faia o le solo i totonu ma le fa'aulaina e le tasi e le isi o le au meamamae ina ua mae'a le sauniga. E na o le pau le mea na le'i o'o iai o ta'igasua. O se aso fiafia ona ua pei lava o se fa'aipoipoga Samoa i atunu'u 'ese, ona o le mea lava lea sa mana'o iai le ulugali'i. Sa faia le aiga i fafo i le lotoa o le fale o le Galuega, pau o le mea e le'i faia se fale ae sa manaia lava le malu o le afiafi sa fai ai le fa'aipoipoga ona o le vaitaimi lea o le taumalulu.

Sa ou faia le fa'apa'iaga, ma nisi o tulaga sa taumafai e fa'amatalatala i le tami o le aiga le fefa'atusatusaa'iina o fa'aipoipoga fa'a Samoa ma le fa'a latou e pei ona sa ta'ua i nisi o tala ua tuana'i atu. Na o'o lava se fa'amatalaga i gagana ma mo'omo'oga masani a le au vala'aulia ma le au faigaluega e ave atu ai se tala "Ina ia Fuatele le Niu." E le iloa e nei tagata foliga o le niu ma ona fua ma pe fa'apefea ona ola, ona taumafai lea e fa'amatala le uiga e fa'aogaina ai le sana ma ona fua.

UAMANUIALE TAUMAFAI O LEA'OA'O

I le mae'a ai o le taumafai o le atali'i sa avea loa o ia ma "Faievagelia i se tasi o matagaluega e ese mai lo le mea na matou iai. O se tagata na fa'aogaina tele e le Atua ae maise lava i tupulaga ma le feagai ai ma lu'itau e tele. O se tagata e pu'upu'u atu i lo a'u ae o le pulela'a a le atali'i o le fa'au'uina ia e le Atua. Na maua tala ina ua maliu si ona faletua i nai tausaga ua tuana'i atu, o lo'o galue pea le uso i le galuega a le Atua.

Saunia: Nuuausala Siaosi (F.S.)

FAASILASILAGA:

Ofisa o Aoaoga Kerisiano:

1. **MAFUTAGA A MOTU, AUTALAVOU**
EFKS 2006
SAVAII 13 & 14 TESEMA – TUASIVI

MATAUPU FAAMAMAFI: O LE
SILISILI ESE O IESU KERISO

11. Sulu Setema 2006

ASO LULU – 13 TESEMA 2006

10.00 a.m.	-	Taunuu autalavou uma/Ave lisi au mafuta i le Ofisa
10.00 – 10.30	-	Tapuaiga amata.
10.30 – 12.00	-	Mataupu Faale-Agaga (Suesuega Tusi Paia)
12.00 – 1.00	-	Pesepesega Aufaipese Aoao Tupulaga o le Ekalesia
1.00 – 2.00	-	Taumafataga
2.00 – 5.00	-	Taaloga (Soccer, Rugby, Touch, Volley Ball)
5.00 – 6.30	-	Faamalu & Taumafataga
6.30 – 7.00	-	Tapuaiga afiafi
7.00 – 10.00	-	Faafiafiaga ma Faa-Evagelia Autalavou filifilia (Sili. Lalomalava, Fagamalo, Auala)

ASO TOFI – 14 TESEMA 2006

5.30 – 6.00	-	Faamalositino
6.00 – 7.30	-	Faamalu & Taumafataga o le Taeao
7.30 – 8.00	-	Tapuaiga Taeao
8.00 – 9.30	-	Tautalaga mo le ola Faale-Agaga o Tupulaga
9.30 – 11.00	-	O Aoaoaga i amioga lelei faa – Kerisiano (M.A.K.)
11.00 – 12.00	-	Pesepesega o le Kirisimasi
	-	Tapunia aloaia le Mafutaga

MAFUTAGA A MOTU, AUTALAVOU

EFKS 2006

UPOLU 18 – 20 TESEMA 2006

MALUA

MATAUPU FAAMAMAFA: O LE

SILISILI ESE O IESU KERISO

ASO GAFUA – 18 TESEMA 2006

12.00 Noon	-	Taunuu Autalavou uma/Ave lisi o le au mafuta i le Ofisa
	-	Tapuaiga amata
	-	Vaevae autalavou i vaega e fa

2.00 – 5.00	-	Taaloga i Vaega (Soccer, Touch Rugby, Volley Ball)
5.00 – 7.00	-	Faamalu & Taumafataga o le afiafi
7.00 – 7.30	-	Tapuaiga afiafi i api
7.30 – 10.00	-	Pepa Faa-le-Agaga
	-	Pesepesega Aufaipese Aoao a Tupulaga o le Ekalesia
	-	Galulue i Vaega mo le Faaaliga o le Aso Lulu

ASO LUA – 19 TESEMA 2006

6.00 – 8.00	-	Lotu Taeao i api
	-	Faamalositino & Taumafataga Ti
8.00 – 12.00	-	Mataupu Faale-Agaga (Suesuega i le Tusi Paia)
	-	Tautalaga mo le ola Faale-Agaga o tupulaga
12.00 – 1.00	-	Taumafataga o le Aoauli
1.00 – 2.30	-	O Aoaoaga i amio lelei faa – Kerisiano (M.A.K.)
2.30 – 4.00	-	Galulue i Vaega mo le Faaaliga i le Aso Lulu
4.00 – 5.30	-	Avanoa mo le saolotoga (Taaloga, Mafuta, Malolo)
5.30 – 6.30	-	Faamalū & Taumafataga o le Afi
6.30 – 7.00	-	Lotu faatasi
7.00 – 10.00	-	Faa-Evagelia & Faafiafiaga Autalavou Filifilia (Falefa, Vini Fou, Fasitoo-Tai, Sataoa)

ASO LULU – 20 TESEMA 2006

5.30 – 6.00	-	Lotu Taeao i Api
6.00 – 7.00	-	Sao a le Mafutaga mo Malua (Community Work)
7.00 – 8.00	-	Taumafataga o le Taeao
8.00 – 10.00	-	Faaaliga a Vaega e Fa
10.30 – 11.30	-	Iloiloga o le Mafutaga, ma le lumanai o Mafutaga Autalavou
12.00	-	Tapunia aloaia le Mafutaga

FAASILASILAGA MO MAFUTAGA

1. E faamoemoe e auai uma Autalavou i Mafutaga ua fuafuaina mo Upolu ma Savaii
2. E saili e Autalavou o latou Api i fale o o latou Pulega poo Matagaluega i Malua. Mo Savaii, e fuafua pea e Autalavou le mea e talafeagai ma latou
3. E feagai lava Autalavou ma faatatauga uma i le tulaga o le Tausiga i taimi uma o le Mafutaga
4. E faaoga toniga mafuta masani a Autalavou o le Ekalesia
5. Silasila i Polokalame ua saunia mo isi tapenaga e tatau ona fai
6. Ia aumai Tusi Paia ma Pese, ma peni ma api mo tusitusiga ma faaumauga
7. E saunia e le Matagaluega o Aoaoga Kerisiano isi mea uma mo le Mafutaga. Tatou talosia ia taunuu i le manuia lo tatou faamoemoe mo Mafutaga a Autalavou a le Ekalesia i lenei tausaga.

II Auaipese Aoaoga a Tupulaga o le Ekalesia.


1. O le a faaauau galuega a le Auaipese pe a mae'a le Lotu a Tamaiti. O le a feagai le auaipese ma tapenaga mo le valaaulia i le tatalaga o le 13 Aso o le Kirisimasi a le Ekalesia i Vaitele-Uta.
2. O lo o ua tatala sui o le Auaipese o loo a'o'oga e sauni mo suega faai'u o le tausaga; e faato'a auai i le faaiuga o Novema pe a mae'a suega.
3. O lo o tatala pea le avanoa mo sui faaopopo, ae maise o i latou e le o toe aoga, o loo faigaluega, pe e le o faigaluega foi. E tumau pea le tausaga i le 16-30, ma e lei faaipoipo. E tumau foi le fuafuaga ia iai sui o Matagaluega uma i le Auaipese.

Faafetai

Faatonu Aoaoga Kerisiano

Faaulufalega o le Malumalu – "PETELI FOU" – ma le faapaiaina o le "MALUAPAPA O LE TALALELEI" Hall – Fairfield (EFKS) Niusauelese – Ausetalia.

O le a lelepa ia faa-vaatii i aauloloa ou paia e le popo Samoa ma ona tuaoi i le Matasaua seia paia Analega. O le



a matou le toe utu vai lepulepu iai, ae o le a matou utuvai lolo e pei o le fetalaiga e fai i le folauga a alii Toga – i ou lumafatatoto, ma ou papa tu loto – ae tainane ou paia faa le Atua, Tulou ia. Ae ua alagaina se leo faatauvaa a'o ala le mafuaalii i le au faitau "Sulu Samoa". E fofogaina ai ma le faaaloalo tele le faamoemoe sa alo iai lenei Ekalesia. O lenei ua tu le faila: e ala i le taotolua o le seuga – O galuega tetele na alo iai le susuga i le Toeaina Faatonu – Rev. Peleti T.Toailoa (FT) ma le mamalu i lenei Ekalesia i Fairfield (EFKS).

E valaau faaaloalo ai i ni ou paolo ma gafa taumalo e malu ai lenei ekalesia, ina ia tala aao ma maluu mai seia o tatou usufono potopoto ma sii le Viiga o le Atua aua o le faamoemoe ua tuunuu o le laau lea o le Ola.

Polokalame:

Aso 15 Tesema 2006 (Aso Faraile)

5.00 am.	Lotu Amata
5.30 am	Taalolo
10.00 am	Popese
12.00 noon	Taumafataga
4.00 pm	Faaaloaloga
6.00 pm	Tatalo faaiu

Aso 16 Tesema 2006 (Aso Toonai)

9.00 am	Tapuaiga/Tatala le Malumalu
12.00 noon	Taumafataga
1.00 pm	Siva-au-alofa (Au Valaaulia)
3.00 pm	Faaaloaloga
6.00 pm	Tatalo Faaiu

Tatala le Filialii – tuama le fua – Folau ia i Lagi e mama – ae matou nofo tapuai atu ma le manuia i le Alofa o le Atua.

Lisi o Matafale o le Aulotu:

- | | |
|---|---|
| 1. Rev. Peleti T Toailoa (FT) & Senetenari Toailoa
(Nuu - Laulii, Vaipu'a Fasitoota) | 13. Sua Luamanuvae (Tiakono) & Logomai Luamanuvae
(Salelavalu, Salelologa, Vaimoso, Satoalepai, Saleimoa, Vaigaga) |
| 2. Loli Leilua (Failautusi) & Lolo Leilua
(Sagone, Vaipua, Safotu) | 14. Sa'u Tamapua (Tiakono) & Matagia Tamapua
(Apolima, Vailima, Tanugamanono, Moataa) |
| 3. Sae Seumanu Malagaoma (Teutupe) & Moli Logotaeao Malagaoma.
(Satuimalufilufi, Vavau, Saaga/Siumu, Salelologa, Vaiafai/Iva – Safai, Matautu) | 15. Tanuvasa Pio (tiakono) & Alosina Tanuvasa
(Nofoalii, Saleimoa, Sapapalii) |
| 4. Tagaloasa Faitua (A'oa'o) & Vaaiga Faitua
(Fagalii, Laulii, Asau, Saleimoa, Avao) | 16. Sagapolu Mamea (Tiakono) & Kuata Mamea
(Saleapaga, Lepa, Faletagaloa, Vailuutai) |
| 5. Roy Saipaia (Aoa'o l'u mai Malua)
(Satuimalufilufi, Tula/Tutuila, Matautu Falelatai) | 17. Muliaga futialo (Tiakono) & Lupe Futialo
(Saleimoa, Sapapalii, Faleseela/Lefaga) |
| 6. Paeloa Ale (A'oa'o) & Marie Ale
(Tafitoala, Lotofaga, Solosolo, Leusoalii/ Luatuanuu fagamalo, Pesega) | 18. Tupuola Eli (Tiakono) & Violeta
(Tafagamanu, Lefag, Siumu, Vaovai) |
| 7. Gafoaleata Faitua (A'oa'o l'u mai Malua) & Lagiraea
(Fagalii, Laulii, Asau, Saleimoa, Avao Falealupo, Tuanai, Tafuna/Am. Samoa) | 19. Tauanuu Soi (Tiakono) & Pai Soi
(Vaovai, Satuimalufilufi) |
| 8. Tuifaasisina Saipaia (Tiakono) Taimatuia Saipaia (Satuimalufilufi, Tula/Tutuila, Falefa) | 20. Leatigaga Faatoafe (Tiakono) & Viola Faatoafe
(Satuimalufilufi, Satapuala, Siutu, Salailua, Savaia, Apia, Papauta) |
| 9. Tuilaepa Faiai (Tiakono) & Maugamu Faiai
(Sapapalii, Saipipi, Salua Manono, Afega, Moataa, Falefa satuimalufilufi) | 21. Leituala Soi (Tiakono) & Ave Soi
(Vaovai, Laulii, Faiaai, Vaipua) |
| 10. Opelu Pisu (Tiakono) & Tina Pisu
(Sataoa, Aufaga, Afega, Malie) | 22. Ierome Mose Aupaau (Tiakono) & Feagai Aupaau
(Salua, Leulumoega, Mulifanua) |
| 11. Maposua Peleti Toailoa (Tiakono) & Ana Toailoa
(Laulii, Vaipu'a, Tonga) | 23. Sose Uele (Tiakono)
(Faatoia, Saleimoa, Moataa) |
| 12. Faaolatane Simi (Tiakono) & Lauie Faaolatane
(Sili Tufutafoe) | 24. Katerina Lele (Tiakono)
(Aufaga, Lepa, Vaovai Matautu Falealili) |
| | 25. Aviata Sailiata (Ekalesia) (Vaovai Falealili) |
| | 26. Silofau Mariner (Ekalesia) & Cathy Mariner
(Papa/Puleia, Lalomalava, Toamua) |

Matafale Fesoasoani:

1. Semo Ofe (Ekalesia) & Vailoa Ofe
(vaiala, Fagaloa, Laulii, Vailoa/Aleipata)
2. Tui Falealili (Ekalesia) Faamitai Falealii
(Tanugamanono, Fasitoouta, Leusoalii, Luatuanuu)
3. Kereta Faatonu (Ekalesia) Kuini Faatonu
(Vailima, Satoalepai, Laulii, Vailoa/Aleipata)
4. Viliamu Palaamo (Ekalesia) & Miriama Palaamo (Toamua)
5. Opelu Aumalosi & Luisa (Sataoa)
6. Vaalele Tapaleao (Aoa Malua) & Tupulagafou Tapaleao (Toamua, Matatufu, Laulii, Vaipua)

la faa soifuaina,

O le Ekalesia ma le Faifeau.

TALA O E MALILIU:

Painuulasi Leilua Sefo: Faletua o le Tiakono – EFKS Tulaele

Soifua mai: Mati 31 1931
Maliu: Aperila 12 2006



O lona tama o Leota Fuitupu ao lona tina o Vau Leota. Na faaetia lo la tofi tiakono ma Leilua Sefo lona alii i le aso 27 Fepuari 1985. O i laua isi na iai i le amataga o le lotu i Tulaele nei i le 1980. Na

fai ma usufono tina i le Fonotele i le 1989. Sa fai ma sui Taitaifono o le mafutaga a tina i le 2002 i le 2004. Sa i tua o lana tane ao fai ma failautusi o le Aulotu i tausaga e ono. E fai mea sasalu ma ona uiga tausaaafia, e malie fua ai le lotu i lana ata ma ona uiga fiafia aua e muliga ni oli a o ni foli. E le ma e tautino lona vaivai e tautala i Afioga Paia a le Atua pe tatalo i sauniga faitele. Ae pei ua fiafia ina ua fai soo ma agai ina masani ai. O se mea fiafia ia te ia lona alo o Faasalafa Alaovae (FS), ina ua alu i Malua ma avefa ma faifeau.

O ona toe sauniga na faia i le malumalu o lana Ekalesia sa ia tapuai ai i Tulaele i le aso 22 Aperila 2006 i le 10.00 i le taeao. Na taitai Eteuati Pasia (FT), Molia i totonu o le malumalu e Faapaia Tariu (FS), Faitau Tusi Paia Iosefa Afutiti (FS), Tatalo Fomai Lafaialii (FS), ae lauga Meatuai Fasavalu (FS).

Na molimau Tapai Vui Faasalafa lana tama teine, o Faasalafa Alaovae (FS), ma Faauuga Matautia (FS) i lona soifua faa le-Agaga. Na faaii i lona toe sauniga i lona nofoaga mau i lona aiga i Tulaele lava na ou taitaina, ma matou faamavae atu ai i le tina i le pese masani a le Au Kerisiano e 268. Talofa uso e, tofaina oe, Tofa! tofa! tofa!

Saunia,

Fa'au'uga Matautia'a (FS) (EFKS Tulaele).

Tuisalogo Tamapolu Ieelua Filipino: Alii Tiakono – EFKS Tulaele.

Soifua mai: 21 Tesema 1924.
Maliu: 27 Tesema 2005

O ona matua o Filipino Tamapolu le tama o Saoluafata ma Toese Tuliati le tina o Safune. Na faaipoipo ia Saimisa o Toamua i le aso 11 Aokuso 1952. O le Alii



Tiakono na tautua i lona tofi i le EFKS i Alamagoto faapea Fugalei ma faaauau mai ai i Tulaele nei i le 1982 seia oo ina maliu. E toalua ona uso ma ona tuafafine e toa fa. E 11 fanau a le fanau ma fanau a

fanau a lana fanau e toa ono, ona maua ai lea o le toa 24 o tagata na ola mai ia te i laua ma le tina.

O ona toe sauniga na faia i le malumalu o le EFKS i Tulaele – 06 Ianuari 2006 i le 10.00 i le taeao. Taitai: Faauga Matautia (FS), Faitau Tusi Paia Laneselota Maliko FM, Tatalo Ieriko Sopoaga (FS), ae lauga Fosi Palaamo (FT). Na molimau i lona soifuaga – 1. Talitiga Luisa Fesilafai (tuafafine) 2. Talitiga Tauveve Leo (afafine) ma Faauga Matautia (FS) i lona soifua faa le-agaga. Na usuina pese o lona toe sauniga e le aufaipese a le EFKS i Tulaele lava. Ona faaiu atu ai lea i lona sauniga mulimuli i lona nofoaga mau i lona aiga i Tulaele lava, ma faatofa atu ai ia te ia i le pese e 268 – Talofa uso e, tofaina oe.

Saunia,

*Faauga Matautia (FS).
EFKS Tulaele.*

& & & & & &

**LELEIGA TAEMOA TAEFU PELE -
Siufaga Falelatai**

Na soifua mai i le aso 27 Tesema 1937 ae maliu i le aso 18 Iuni 2006 i lona aiga i Siufaga ina ua leva ona faataotolia i gasegase o le tino.



Na la galulue i lo la tofi Tiakono i le aso 28 Me 1980 seia oo ina valaau mai lona matai. O se tina e fesoasoani tele ile Afioga ia Taefu Pele i le vaaia o le Malumalu

aemaise o le kiina o moli ma le tapeina i taeao ma afaifi.

E toaga tele le tina i le Lotu, faamaopoopo foi i mafutaga a le Pulega ma le Matagaluega. O se tina galue lelei ma le faatuatua i le Alii. E loto tele, finau i mea lelei ma e agalelei ma alofa foi i le faifeau ma le aiga, fiafia e tautua i le Talalelei a le Alii.

Sa matou lolotu i le Aso Sa 27 Iuni i le malumalu lava i Siufaga, ma sa molimau ai nisi o le fanau ma le aiga ma o au foi sa faia foi le upu faamafanafana.

O lona Sauniga sa faia i le Aso 28 Iuni 2006 i le malumalu o le EFKS i Siufaga lava. O le Susuga i le Toeaina ia Tautiaga Senara sa taitai ma faitauina le Tusi Paia, o Kaisala Asiasiga (FS) na Tatalo, o Misiperetiso Ivara (FS) na Lauga ao a'u sa faaulufaleina, faia le molimau ma lona toe sauniga i lona oliolisaga Tumau i lona aiga i Siufaga.

AMUIA E UA OTI UA OTI OI LE ALII.

Tofa Soifua:

Opapo Soanai Oeti (FS)



Ata:

Luga: O le Misionare o Ioane Viliamu

Lalo: Ma'a Fa'amanatu o le taunu'u mai o le Tala Lelei